



## Fegl d'infurmaziun concernent l'annunzia da la surdebitaziun e la decleraziun d'insolvenza tar ina societad anonima (SA)

### 1. Annunzia da la surdebitaziun (deposit da la bilantscha)

"Vossa" societad anonima è surdebitada. Pervia da quai vulais Vus annunziar la surdebitaziun da la societad tar la dretgira da concurs (uschenumnà deposit da la bilantscha, guardar art. 725b al. 3 DO). Per quest intent stuais Vus inoltrar ils suandants documents en furma cumpletta a la dretgira da concurs:

- > in **annunzia explicita da la surdebitaziun**, suttascritta d'ina commembra/d'in commember dal cussegl d'administraziun legitimà da represchentar,
- > ina **decisiun da majoritad** valaivla **da l'entir cussegl d'administraziun**, cun la quala è vegnida concludida l'annunzia da la surdebitaziun,
- > mintgamai ina **bilantscha intermediara actuala** da las **valurs d'alienaziun** e da las **valurs da cuntinuaziun** suttascritta d'ina commembra/d'in commember dal cussegl d'administraziun legitimà da represchentar,
- > in **rapport d'ina revisura/d'in revisur admess** davart la controlla da las bilantschas intermediaras che ston vegnir inoltradas,
- > in **extract dal register da commerzi** da la data la pli actuala dal register da commerzi dal Grischun,
- > ina **decleranza**, sche la societad è proprietaria da bains immobigliars (p.ex. immobiglias, proprietad en condomini, dretgs da construcziun) u betg. Sch'igl exista ina proprietad da bains immobigliars ston vegnir inditgads ils **lieus da quests bains immobigliars** (adressa: via, lieu e chantun).

Faschai per plaschair ina glista dals documents inoltrads.

Sch'il rapport d'ina revisura/d'in revisur admess manca u sch'ils *documents* menziunads qua survart *na vegnan betg inoltrads cumplettamain*, na po la surdebitaziun betg vegnir controllada **ed i na po pervia da quai betg vegnir entrà en la dumonda**.

### 2. Decleraziun d'insolvenza

"Vossa" societad anonima n'ha pli nagins meds finansials liquids. Ella po sezza dumandar l'avertura dal concurs cun surdar a la dretgira ina decleraziun d'insolvenza sin basa da l'art. 191 LSC. Sche Vus vulais far diever da questa simpla pussaivladad d'avertura dal concurs, ston vegnir inoltrads ils suandants documents tar la dretgira da concurs:

- > ina **decleraziun d'insolvenza explicita** d'ina commembra/d'in commember dal cussegl d'administraziun legitimà da represchentar,
- > in **conclus documentà publicamain** d'ina notara/d'in notar, en il qual la radunanza generala constatescha l'insolvenza, concluda la consegna da la decleraziun d'insolvenza tar la dretgira da concurs ed incumbensescha il cussegl d'administraziun da dumandar la schliaziun da la societad pervia d'insolvenza,
- > in **extract dal register da commerzi** da la data la pli actuala dal register da commerzi dal Grischun,
- > ina **decleranza**, sche la societad è proprietaria da bains immobigliars (p.ex. immobiglias, proprietad en condomini, dretgs da construcziun) u betg. Sch'igl exista ina proprietad da bains immobigliars ston vegnir inditgads ils **lieus da quests bains immobigliars** (adressa: via, lieu e chantun).

Per ils custs d'ina eventuala avertura dal concurs sto vegnir fatg in **pajament anticipà en daner blut da 4'000.00 francs** a la dretgira responsabla en contant u sin il conto da posta correspondent.

Pir cur che quests documents èn avant maun e cur ch'il pajament anticipà dals custs è fatg, succeda l'avertura dal concurs.